

ҚАДИМ СУРХОН НАВОЛАРИ



ҚАДИМ СУРХОН НАВОЛАРИ

*(Аллалар ва Сурхондарё никоҳ тўйи
маросими қўшиқлари)*

«САНЪАТ» нашриёти
ТОШКЕНТ – 2006 й.

Ёзиб оловчи ва тўплаб нашрга тайёрловчи

МУЗАФФАР НАИМОВ

*Масъул муҳаррир ва сўзбоши муаллифи
филология фанлари доктори, профессор*

МАМАТҚУЛ ЖЎРАЕВ

Халқ қўшиқлари миллий маданиятимизнинг энг қадимий ва умрбоқий бадиий силсилаларидан бири бўлиб, аجدодларимиз турмуш тарзи, анъаналари, орзу-интилишларининг ўзига хос қомусидир. Шунинг учун ҳам фольклор асарларини, айниқса, халқ қўшиқларини кенг оммалаштириш миллий ўзликни англашда муҳим аҳамият касб этади. Сурхондарё вилоятидан ёзиб олинган халқ қўшиқлари тўплами ҳам ана шундай эзгу мақсадга хизмат қилади.

Тўплам халқ оғзаки бадиий ижодиёти билан қизиқувчи кенг китобхонлар оммасига мўлжалланган.

АСРЛАРГА БЎЙДОШ ҚЎШИҚЛАР

Маълумки, ўзбек халқ қўшиқларининг бетакрор жозибасига мафтун бўлган ҳар қандай киши бу жавоҳир дурдоналарини боболаримиз поэтик тафаккурининг сарчашмаларига ўхшатгиси келади. Очигини айтганда, бу — жуда тўғри қиёс. Зотан, бадий салохияти гоёт баланд бўлган аждодларимизнинг беназир ижодий иқтидори туфайли юзага келиб, неча-неча асрлар ардоғида сайқалланган бундай фусункор оҳанглар ҳар қандай кишини сеҳрлаши табиий. Қолаверса, минг йиллар мобайнида эл-юртга жуда катта руҳий-маънавий қувват бахш этиб келган халқ қўшиқлари шонли тарихимизнинг бадий зарварақлари ҳамдир.

Халқимиз қалбининг энг нафис ва нозик ҳиссиётлари тўлқини бўлмиш қўшиқлар миллий маънавиятимизнинг бебаҳо хазинаси ҳисобланади. Мисраларга айланган қанотли орзулар ҳамда гўзал ташбеҳларга йўғрилган халқ қўшиқлари — ёр-ёр, ўлан, лапар, келин салом ва хилма-хил тароналар ҳеч қачон тароватини йўқотмайди. Нафосат гулшанида унган бундай бадийят қатралари шахс маънавий комиллигининг илк сарчашмаси бўлибгина қолмай, ўзида аждодларимизнинг яратувчилик, бунёдкорлик, эзгулик ва муҳаббат билан боғлиқ улуғвор қарашларини акс эттирганлиги учун ҳам умрбоқий қадриятлар тизимига айланган.

Халқимизнинг асрларга бўйдош қўшиқлари ҳар қандай кишининг қалбини титратмай қўймайди. Истиқболи ойдин Ўзбекистонимизнинг қай бир сўлим гўшасига қадам қўйманг, мунис онахонларимизнинг оромижон алласию, ҳар сўзида қалб нури жилоланган мўъжизакор қўшиқларнинг гламай қайтмайсиз. Ана шу бой маданий меросимиз хазинаси — бадий сўз дурдоналарини тўплаш унинг ижодкорлари ва ижрочилари иқтидорига бўлган юксак эҳтиромнинг ўзига хос бир кўринишидир. Фольклор

асарларини ёзиб олиш ва унинг энг яхши намуналарини кенг оммалаштириш халқимиз руҳияти, ўзига хос турмуш тарзи, орзу-интилишлари, қувончу ташвишларини гоят теран ифодалаган кўшиқчилик санъати анъаналарини сақлаб қолиш ва келгуси авлодларга етказишда ҳам муҳим аҳамият касб этади. Кўп минг йиллик тарихга эга бўлган ўзбек халқ кўшиқчилиги анъаналарини кўз қорачиғидай авайлаб-асраш орқали унинг бизгача етиб келган тароналарини кенг кўламда ривожлантириш ва замондошларимиз бадий салоҳияти воситасида янада тараққий эттириш бугунги кунимизнинг долзарб вазифаларидан биридир.

Шу жиҳатдан қараганда, деновлик ёш муаллим, халқ оғзаки бадий ижодиёти ва кўшиқчилик санъатининг чинакам ихлосманди Музаффар Наимовнинг Сурхондарё вилояти бўйлаб ўтказган кўп йиллик фольклор экспедициялари маҳсули ўлароқ юзага келган “Қадим Сурхон наволари” номли кўшиқлар тўплами ҳам ана шундай эзгу изланишлар меваси саналади. Узоқ йиллар мобайнида Хайробод педагогика коллежида ёшларга сабоқ бериб келаётган М.Наимовнинг асли касби — мутахассислиги мусиқа ўқитувчиси. Унинг момоси Руқия ая ҳамиша невараларини жозибадор алла оҳанглари остида ухлатишни яхши кўрар, узун қиш кунлари болаларини пинжига олиб, узундан-узун эртакларни, ибратли нақлларни ҳикоя қилиб берарди. Чунки у гоят сўзга чечан, ҳар бир гапида ҳикматли сўзларни ўринли қўллайдиган, яъни “гапга гул кўндириб” гурунглашадиган дилбар инсон бўлган. Шунинг учун ҳам Музаффар жуда ёшлигиданоқ халқ оғзаки бадий ижодиётига ихлос қўйди. ўрта мактабда, сўнгра Деновдаги мусиқа мактаби ҳамда Термиз мусиқа билим юртида ўқиб юрган кезларидаёқ адабиёт муаллимининг йўл-йўриқлари асосида алла, ёр-ёр, топишмоқ, мақол, эртақ ва ривоятларни ёзиб олди. Наврўз сайли ва тўй-ҳашамларга ташриф буюрган донгдор бахшиларнинг дostonлари ҳамда сержило дўмбира куйларини жон қулоғи билан берилиб тинглади. Ажиб бир энтикиш билан оstonаси тилло уй

бўсағаси олдида турган келинчакнинг пойига “ёр-ёр”у “ўлан”лардан пояндоз тўшайдиган аёлларнинг ижрочилик маҳорати уни, айниқса, ўзига ром этган эди. Шу боис Музаффар Наимов болалигиданоқ қадим Сурхон қўшиқларининг мафтунни бўлиб қолди. Аждодларимизнинг маънавий қадриятларини ўрганишга бўлган ҳавас Тошкент давлат консерваториясида таҳсил олган кезларида ҳам уни сира тарк этгани йўқ. Ҳар йили таътил бошланиши билан у ўз она диёри — Денов шаҳрига ошиқар ва ёз бўйи ўзининг севимли машғулотини — халқ қўшиқларини тўплаш, ёзиб олиш, устозларидан ўрганган мусиқий сабоқлари асосида ноталаштириш билан шуғулланиди.

Ана шу фольклористик изланишлар натижасида “Сурхон қўшиқлари” номли икки қисмдан иборат китоби чоп эттирилди. Қолаверса, Ўзбекистонда хизмат кўрсатган санъат арбоби, санъатшунослик доктори, профессор Рустам Абдуллаев раҳбарлигида Сурхондарё вилояти маросим фольклори мусиқаси бўйича номзодлик диссертацияси устида иш олиб бормоқда.

Ўзбек фольклорининг алла, ёр-ёр ва келин салом жанрларига оид бадиий матнлардан тузилган ушбу тўпламга Сурхондарё вилояти халқ оғзаки бадиий ижодиётининг ҳудудий ўзига хослигини кўрсатувчи фольклор асарларигина киритилганлиги эътиборлидир. Боботоғдан ёзиб олинган қуйидаги “алла”ни ўқир экансиз, беихтиёр ўз нури дийдасига бўлган меҳрини бениҳоя нозик ҳиссиётлар ила ифода этган ижрочининг бетакрор маҳорати олдида лол қоласиз. Чунки бу “алла”да сўзлар шунчаки куйланмайди, балки сўзлар рақс тушади, сўзлар бағридаги ҳадсиз меҳр булоғи қайнаб-жўшади:

*Далада от бойладим,
Жоним болам алла-ё.
Айланиблар юрсин деб,
Ширин болам алла.*

Ёки:

*Қир-адирнинг лоласиё, алла,
Айланиб кетсин холасиё, алла,
Қора уйнинг мўрисиё, алла,
Энаси бўлсин чўрисиё, алла.*

Маълумки, Сурхон воҳаси фольклори ҳақида сўз юритганда беихтиёр неварасини тиззасига олганча авайлаб ухлатаётган боболар алласи — “хуйя” ёки “хуёлло” жанри ёдга тушади. Диёримизнинг бошқа гўшаларида учрамайдиган бу фольклор жанрига оид матнлар илк бор 1958—59 йилларда фольклоршунос Т.Мирзаев томонидан ёзиб олинган. Лекин бу жанр намуналари ҳозирга қадар тўла тўпланиб, илмий ўрганилганича йўқ. Шунинг учун ҳам Музаффар Наимов томонидан тузилган мазкур тўпламга “хуёлло” қўшиқларининг ажойиб намуналари киритилганлиги муҳим илмий аҳамиятга эгадир. Олтинсой туманининг Катта Вахшивор қишлоғида истиқомат қилувчи Нарзулло Ҳотамовдан ёзиб олинган “хуёлло” қўшиқларига жо бўлган самимият, халқимизга хос бағрикенглик ва меҳр-мурувватлилиكنинг беқиёс бадиий талқини кишида ўчмас таассурот қолдиради:

*Сурув бўлсин подасия,, йу-хуй, йу-хуй, йу-хуй, йу-хуй,
Янчоч қолсин ходасия, йу-хуй, йу-хуй, йу-хуй, йу-хуй,
Бир кун элга бош бўлсина, йу-хуй, йу-хуй, йу-хуй, йу-хуй,
Кўп бўлсин садағасия, йу-хуй, йу-хуй, йу-хуй, йу-хуй.*

Тўпламда бундай таъсирчан мисралар, ижрочи қалбининг туб-тубидан оҳорланиб, товланиб чиққан камалакдай сержило қўшиқлар жуда кўп. Ўйлайманки, бу китоб ўқувчини бефарқ қолдирмайди. Зеро Сурхон воҳасининг залворли тоғлари оша таралаётган асрий оҳанглар бизни боболаримиз тафаккурининг сирли мўъжизалари сари етаклайди.

Маматқул ЖЎРАЕВ,
филология фанлари доктори, профессор

Кўзимнинг оқ-қораси, алла жонима, алла,
 Кўзимнинг нури дийдаси, алла жонима, алла.
 Бурнисини икки палласи, алла жонима, алла,
 Осмондаги юлдузим, алла жонима, алла.
 Яқамдаги қундузим, алла жонима, алла.
 Алла айтиб боламниё ухлатайин, алла,
 Жоним болам кўзимга алла айтай, алла,
 Танамдаги жонимсан, алла болам, алла,
 Қалбимнинг сен меваси, ухла болам, алла.
 Сенга тилаб оламни тебратаман, алла,
 Соғлигингни тилайман оллоҳимдан, алла.
 Оллоҳ берди сени менга, жоним болам, алла,
 Ухлаб катта бўл тезда ширин болам, алла.
 Болдан ширин бўларми, жон боласи, алла,
 Жонимдан ортиқ кўрдим сиз боламни, алла.
 Эртанги сен қувончим катта бўлгин, алла,
 Отанг каби сен бир кун таянчим бўл, алла.
 Тоғим бор деб ортимда суянайин, алла,
 Келажагингдан ўзим қувонайин, алла.
 Одам бўлгин одамларнинг сен сараси, алла,
 Элга хизмат қил болам сен таянчим, алла.
 Шунда танам яйрайди, жоним болам, алла,
 Элда хизматда бўлсанг, ширин болам, алла.
 Оллоҳ фарзанд берибди бокира бўл, алла,
 Ростгўй оқил одам бўл, жоним болам, алла.
 Луқмаси пок одамнинг йўли равон, алла,
 Равон йўлдан юргин сен жоним болам, алла.
 Мендан ўсган дарахтим мевали бўл, алла,
 Меваларинг хор қилма азиз болам, алла.
 Никоҳ билан уй қурган ота-бобонг, алла,
 Сен покиза инсон бўл, жоним болам, алла (1).

Алла, алла, аҳди бор-а, алла-ё, алла-ё,
 Уйқунинг ҳам вақти бор-а, алла-ё, алла-ё,
 Алла айтган энангниё, алла-ё, алла-ё,
 Қоп-қорайган бахти бор-а, алла-ё, алла-ё.

Дашту далада узум, алла-ё, алла-ё,
 Узганимни ким билар-а, алла-ё, алла-ё.
 Ҳасрату армон билан, алла-ё, алла-ё,
 Жон берганимни ким билар-а, алла-ё, алла-ё.

Сен суюкли эркатоим, алла-ё, алла-ё,
 Шўхликкина қўзичоғим, алла-ё, алла-ё.
 Суйиб-суйиб ўпай сени, алла-ё, алла-ё,
 Ширингина дўмбоғим, алла-ё, алла-ё (2).

* * *

Алла болам алла-ё,
 Жоним болам алла.
 Беқасам тўн кийгиздим
 Жоним болам алла-ё.
 Ярашиблар юрсин деб,
 Ширин болам алла.
 Белингга белбоғ ўратдим,
 Жоним болам алла-ё.
 Маҳкам ушлаб турсин деб,
 Ширин болам, алла.
 Далада от бойладим,
 Жоним болам, алла-ё.
 Айланиблар юрсин деб,
 Ширин болам, алла.

Умид билан боқдим,
Жоним болам, алла.
Ўйнабгина юрсин деб,
Ширин болам, алла.

Умид билан катта қилдим,
Жоним болам, алла-ё.
Чавандозлар бўлсин деб,
Ширин болам, алла.

Сой ёқалаб кетайин,
Жоним болам, алла.
Сойдан бодом терайин,
Ширин болам алла.

Тергангина бодомимни,
Ширин болам, алла.
Ўровингга¹ солайин,
Жоним болам, алла.

Ўтовингнинг ичида,
Жоним болам, алла.
Жавлон уриб ётайин,
Ширин болам, алла.

Алла болам оҳори²,
Жоним болам, алла.
Буғдой эккан наҳори,
Ширин болам, алла.

¹ Ўровингга — чақалоқнинг ётоқ ўрни.

² Охори — жуда нозик, гард тегмаган.

Чумчуқ есин донини,
Жоним болам, алла.
Дуо қилсин доимо,
Шу боламнинг жонини.
Алла болам, йигитим,
Жоним болам, алла.
Баҳор эккан чигитим,
Ширин болам, алла.
Униб чиқсин мулойим, аллаё,
Болагинамнинг жонини
Асрасина худойим, алла.

Пиёлага пиёзим,
Жоним болам, алла.
Билаб олган ниёзим,
Ширин болам, алла.

Пиёлага пиёз қиз,
Жоним болам, алла.
Хўжасига ниёз қиз,
Ширин болам, алла.

Алла болам ёйдайин,
Жоним болам, алла.
Ёйлик чиққан кундайин,
Ширин болам, алла.
Алла болам алла-ё,
Ширин болам алла-ё, алла (3).

* * *

Болажоним сардориё, алла
Юрагимнинг дармониё, алла.
Ухла қизим, алла-ё, алла,
Ширин тойим, алла-ё, алла.

Тебратадиган опанг бора, алла,
Алла айтай тинглагина, алла,
Кулоқ солиб ухлагина, алла,
Зардолининг танасиё, алла.

Ўргилсино аммасиё, алла,
Ёғ кадининг латтасиё, алла.
Айлансинда холасиё, алла,
Хабар олсин тоғасиё, алла (4).

* * *

Сув кадининг латтасиё, алла,
Айланиб кетсин отасиё, алла.
Катта тутнинг танасиё, алла,
Айланиб кетсин энасиё, алла.

Чориғининг пошнасиё, алла,
Айланиб кетсин ошнасиё, алла.
Чинни чойнакнинг шаммасиё, алла,
Айланиб кетсин аммасиё, алла.

Қир-адирнинг лоласиё, алла,
Айланиб кетсин холасиё, алла.
Қора уйнинг мўрисиё, алла,
Энаси бўлсин чўрисиё, алла (5).

* * *

Алла болам, жотағаё, алла,
Гул достикқа ботағаё, алла.
Аллайов алла, аллаё алла.
Етти ойлик вақтингда, аллаё алла.
Отанг кетди урушга, алла.
Урушлари қўрисино, аллаё алла,
Душманларга ўт тушсино, аллаё алла,
Аллайов алла, аллаё алла.

Душманларнинг деволиё, алла,
Ўрмалайди чумоли, аллаё алла.
Чумолига жўқмидиё, аллаё алла,
Бегуноҳлар уволиё, алла,
Аллайов алла, аллаё алла.

Отанг журган жўлларга, аллаё алла,
Гул чамбарлар очилсино, алла.
Душман юрган жўлларгаё, аллаё алла,
Чақир тикон босилсино, алла.
Аллайов алла, аллаё алла.

Чироғим бор ўнинчи, аллаё алла,
Пилиги ўн биринчи, алла.
Солдатларнинг ичидаё, аллаё алла,
Отагинанг биринчиё, аллаё алла.
Аллайов алла, аллаё алла.

Қора уйдинг жопсари¹, аллаё алла,
Очиб қаранг ким сари, алла.
Жопсар жориб қарасам, алла,
Куёв қонниқ қопсари², алла.
Аллайов алла, аллаё алла (6).

* * *

Алла жоним айлансин, аллаё алла,
Белинг маҳкам боғлансин, аллаё алла.
Худойжоним умр бериб, аллаё алла,
Боғинг маҳкам боғлансин, аллаё алла.

¹ Жопсари — ёпгич.

² Қопсари — семиз, бақалоқ.

Қошинг қаро ё кундуз, аллаё алла,
Кеча ухла ё кундуз, аллаё алла.
Сенга ҳамроҳ бўлсин, аллаё алла.
Кеча билан кундузей, аллаё алла.

Бошинг эсон бўлсина, аллаё алла,
Умринг узоқ бўлсина, аллаё алла.
Ота-онанг омон бўлиб, аллаё алла,
Сени катта қилсина, аллаё алла.

Югуриб йўлларга кирсин, аллаё алла,
Боғлардан гуллар терсин, аллаё алла.
Бобо-момонг келганда, аллаё алла,
Тезде салом бергина, аллаё алла.

Ой нечага-нечага, аллаё алла,
Булбул қўнар гул ғунчага, аллаё алла.
Алла айтиб берайин, аллаё алла,
Сендайгина баччага, аллаё алла (7).

* * *

Худо берган эрмагим,
Шоли билан курмагим,
Жоним болам, алла.

Айланайин айвоним,
Юрчи билан Деновим,
Қўзим болам, алла.

Қариганда боқарим,
Чироғимни ёқарим,
Ширин болам, алла.

Сум¹ сарик, сочим сарик.
Сарғайганимни ким билар,
Жоним болам, алла.

Бу мусофир юртига,
Жон берганимни ким билар,
Ширин болам, алла.

Кўзимдан оққан ёшга,
Сен ҳайронлар бўлмагин,
Жоним болам, алла.

* * *

Белгинамнинг қуввати,
Жоним болам, алла.
Тилгинамнинг узунни,
Ширин болам, алла.

Давраларда сўзлар сўзим,
Жоним болам, аллаё.
Чақнаб турган чақмоқ кўзим,
Ширин болам, аллаё.

Саҳарлаб уйғонадурман,
Жоним болам, аллаё.
Илондек чўлғонадурман,
Ширин болам, алла.

Иним ёдимга тушганда,
Жоним болам, аллаё.
Худо деб ёлворадурман,
Ширин болам, алла (8).

¹ Сум — ранг, рўй.

ХҲЙО-ХҲЙ

ХҲйо болам, хҲйо-хҲй
ХҲйо-хҲй, талқон туй.
Бир коса сув, бетингни жув,
ХҲйо болам, хҲйо-хҲй.

Чамбил белдан от қочирдим,
Изи жўқ, хҲйо болам, хҲйо-хҲй.
Қирқ жигитга май ичирдим,
Тузи жўқ, хҲйо болам, хҲйо-хҲй.
ХҲйолар қилай боламдия, хҲйо-хҲй,
Жўлларига солай туямдия, хҲйо-хҲй.
Туялар бўйин эгканда, хҲйо-хҲй,
Миндирайинда боламдия, хҲйо-хҲй.

Муродбойим от чопсина, хҲйо-хҲй,
От устида мол топсина, хҲйо-хҲй.
Катта чопоғон бўлсина, хҲйо-хҲй,
Улисини¹ унгарсин, хҲйо-хҲй,
Тирисини² ҳайдатсина, хҲйо-хҲй.

Мўл бўлсинда рискисия, хҲйо-хҲй,
Тўкин бўлсин рўзғорие, хҲйо-хҲй.
Дастурхони нондан тўлсин, хҲйо-хҲй,
Дондан тўлсин омборлари, хҲйо-хҲй.
Қўйдан тўлсин қўтония, хҲйо-хҲй,
Молдан тўлсин жайловия, хҲйо-хҲй (1).

¹ Улисини ўнгарсин — улушини, улогини ажратсин.

² Тирисини ҳайдатсин — ажратган мол, улогларни подага қўшиш.

Келгин болам тиззамга,
Ёл¹ буларсан ўзимга,
Қулоқ солгин сўзимга
Ҳуйо болам, ҳуйо.

Жоним болам от чопсин,
Отига бахмал ёпсин,
Ҳуйя солсин отаси,
Орқасидан ёл топсин,
Ҳуйё болам, ҳуйё.

Болам сен ҳам ботирим,
Чопиб келаётирим.
Чўпон бўлсанг қўйларга
Боқарсан ўтлоқ, сойларга
Ҳуйё болам, ҳуйё.

Ҳуйё-ҳуйё, ҳуйёнг қани?
Бованг берган туянг қани?
Бованг берган туянг бўлса,
Боқиб юрганларинг қани?
Боқиб юрган туянг бўлса,
Адир ҳам чўлларинг қани?

Ҳуйё қилай ҳуйдага,
Отинг солгин тўдага.
Ҳуйё қилсам ухлагин,
Отанг сендан садаға .
Ҳуйё болам, ҳуйё-и-и! (2).

¹ Ёл — ҳамроҳ.

Хуёлло буваси қашқа, йу-хуй, йу-хуй, йу-хуй, йу-хуй,
 Хўкизи киради мошга, йу-хуй, йу-хуй, йу-хуй, йу-хуй,
 Қўшга илдам бўлмаса-я, йу-хуй, йу-хуй, йу-хуй, йу-хуй,
 Қайла қилинглари гўштга йу-хуй, йу-хуй, йу-хуй, йу-хуй,
 Терисини сийириб-а, йу-хуй, йу-хуй, йу-хуй, йу-хуй,
 Пичинглари кўп ковушга, йу-хуй, йу-хуй, йу-хуй, йу-хуй.

Бир жуп беринг Бувишга, йу-хуй, йу-хуй, йу-хуй, йу-хуй,
 Яна бир жуп Кумушга, йу-хуй, йу-хуй, йу-хуй, йу-хуй,
 Қолгани эли-хешга, йу-хуй, йу-хуй, йу-хуй, йу-хуй.

Ола чипор оёғи, йу-хуй, йу-хуй, йу-хуй, йу-хуй,
 Темирдайин туёғи, йу-хуй, йу-хуй, йу-хуй, йу-хуй,
 Хуёлла айтай хуй бўлгина, йу-хуй, йу-хуй, йу-хуй, йу-хуй,
 Ювошгина қўй бўлгина, йу-хуй, йу-хуй, йу-хуй, йу-хуй,
 Худойимдан тиладима, йу-хуй, йу-хуй, йу-хуй, йу-хуй,
 Катта бўлгин, тўй бўлгин-а, йу-хуй, йу-хуй, йу-хуй, йу-хуй.

Бувагинанг даласи-я, йу-хуй, йу-хуй, йу-хуй, йу-хуй,
 Хўкизининг малласи, йу-хуй, йу-хуй, йу-хуй, йу-хуй,
 Юрагимди эзади-я, йу-хуй, йу-хуй, йу-хуй, йу-хуй,
 Момосининг алласи, йу-хуй, йу-хуй, йу-хуй, йу-хуй.

Холаси холдор бўлсино, йу-хуй, йу-хуй, йу-хуй, йу-хуй,
 Шу болам молдор бўлсин-а, йу-хуй, йу-хуй, йу-хуй, йу-хуй,
 Шохдор-шохдор хўкизлара, йу-хуй, йу-хуй, йу-хуй, йу-хуй,
 Тулпори ёлдор¹ бўлсина, йу-хуй, йу-хуй, йу-хуй, йу-хуй.

Ё худойим ёш берсина, йу-хуй, йу-хуй, йу-хуй, йу-хуй,
 Қозон тўла ош берсина, йу-хуй, йу-хуй, йу-хуй, йу-хуй,
 Шу йигитнинг бахтига, йу-хуй, йу-хуй, йу-хуй, йу-хуй,
 Бир ёш қаламқош берсина, йу-хуй, йу-хуй, йу-хуй, йу-хуй.

¹ Ёлдор — ҳайвонлар гарданида бўладиган узун соч.

Оппоқ бўлсин соқоли-я, йу-хуй, йу-хуй, йу-хуй, йу-хуй,
Отлар минсин тақалиё, йу-хуй, йу-хуй, йу-хуй, йу-хуй,
Чирозлари ярашган, йу-хуй, йу-хуй, йу-хуй, йу-хуй,
Тўнлар кийсин, ёқали-я, йу-хуй, йу-хуй, йу-хуй, йу-хуй,

Сурув бўлсин подасия, йу-хуй, йу-хуй, йу-хуй, йу-хуй,
Янччоқ қолсин ходасия, йу-хуй, йу-хуй, йу-хуй, йу-хуй,
Бир кун элга бош бўлсина, йу-хуй, йу-хуй, йу-хуй, йу-хуй,
Кўп бўлсин садағасия¹, йу-хуй, йу-хуй, йу-хуй, йу-хуй.

Камар² боши товаси, йу-хуй, йу-хуй, йу-хуй, йу-хуй,
Тоғларининг лоласи, йу-хуй, йу-хуй, йу-хуй, йу-хуй,
Бувасининг боласия, йу-хуй, йу-хуй, йу-хуй, йу-хуй,
Келсин ҳар ким ҳаваси, йу-хуй, йу-хуй, йу-хуй, йу-хуй.

Ярашади қилиғи, йу-хуй, йу-хуй, йу-хуй, йу-хуй,
Қошларининг пилиғи, йу-хуй, йу-хуй, йу-хуй, йу-хуй,
Полвон бўлсин худойим-а, йу-хуй, йу-хуй, йу-хуй, йу-хуй,
Тўла бўлсин илиғи-я, йу-хуй, йу-хуй, йу-хуй, йу-хуй.

Қишда қалин қор бўлсин-а, йу-хуй, йу-хуй, йу-хуй, йу-хуй,
Элга номус-ор бўлсина, йу-хуй, йу-хуй, йу-хуй, йу-хуй,
Катта-кичик ҳаммага, йу-хуй, йу-хуй, йу-хуй, йу-хуй,
Худо мададкор бўлсина, йу-хуй, йу-хуй, йу-хуй, йу-хуй (3).

¹ Садаға — қурбонинг бўлай, ўргилай.

² Камар — сув ювиши натижасида пайдобўлган ўйиқ жой.

“ЁР-ЁР”

Нима кийсанг ярашади,
Бўйгинанга ёр-ёрей, ёр-ёрей.
Ўлан айтай деб келдимо,
Тўйгинанга ёр-ёрей, ёр-ёрей.

Отанг қилган бу эшик,
Ёпилмайди ёр-ёрей, ёр-ёрей.
Шу қиз тенги дунёда,
Топилмайди ёр-ёрей, ёр-ёрей.

Ҳай, ҳай ўлан, жон ўлан,
Кимни тўйи ёр-ёрей, ёр-ёрей.
Оқ гул билан қизил гул,
Қизни тўйи ёр-ёрей, ёр-ёрей.

От боғлаган қозиқни,
Ўтов денглар ёр-ёрей, ёр-ёрей.
Келин келган эшикни,
Тилло денглар ёр-ёрей, ёр-ёрей.

Ҳай, ҳай ўлан, жон ўлан
Саккиз денглар ёр-ёрей, ёр-ёрей.
Саккиз боғда очилган,
Гул лоламиз ёр-ёрей, ёр-ёрей.
Саккиз қизни сардори,
Биз бўламиз ёр-ёрей, ёр-ёрей.

Офтобага сув қуйманг,
Тошар кетар ёр-ёрей, ёр-ёрей.
Узоқларга қиз берманг,
Олар кетар ёр-ёрей, ёр-ёрей.
Қуда холам томиниё,

Толдан ёпган ёр-ёрей, ёр-ёрей.
Унинг тол ёғочини,
Қайдан олган ёр-ёрей, ёр-ёрей (1).

* * *

Сойдан чиққан қамишни, ёр-ёрей,
Чойдишга¹ сол қайнасин, ёр-ёрей.
Икки мўмин ёр бўлди, ёр-ёрей,
Қарсак чалинг ўйнасин, ёр-ёрей.

Рўмолим бор ҳарирдан, ёр-ёрей,
Қизил гулнинг баргидан, ёр-ёрей.
Ўтирсам туролмайман, ёр-ёрей,
Ошиқликнинг дардидан, ёр-ёрей.

Қоши энди кўзингдан, ёр-ёрей,
Ширин энди сўзингдан, ёр-ёрей.
Ёринг ўзи айлансин, ёр-ёрей,
Босган энди изингдан, ёр-ёрей.

Меҳмонхона ўчоғи, ёр-ёрей,
Кўкча қовун пўчоғи, ёр-ёрей.
Жигитларга шириндир, ёр-ёрей,
Келин ойнаинг кучоғи, ёр-ёрей.

Келин ойнаинг лабларида,
Холи бордир ёр-ёрей.
Куёвжонга гап берганда,
Тилларида боли бор, ёр-ёрей.

Эшик олди мошпоя, ёр-ёрей,
Барги бошимга соя, ёр-ёрей.

¹ Чойдиш — сув қайнатадиган қумғон.

Ҳамма дардга бор даво, ёр-ёрей,
Ошиқликка йўқ даво, ёр-ёрей.

Олма берсам олмайсан, ёр-ёрей,
Беҳи берсам кўнмайсан, ёр-ёрей.
Қайси боғнинг гулисан, ёр-ёрей,
Қандай бойнинг қизисан, ёр-ёрей.

Пиёлага чой қуйдим, ёр-ёрей,
Чайқамангиз, тўкмангиз, ёр-ёрей.
Менга ваъда берсангиз, ёр-ёрей,
Урушмангиз, сўкмангиз, ёр-ёрей.

Жар ёқалаб қишладим, ёр-ёрей,
Жардана чумчуқ ушладим, ёр-ёрей.
Дўнг юрдимда, паст юрдим, ёр-ёрей,
Сен қизнингда хушладим, ёр-ёрей.

Бозорларга бораман, ёр-ёрей,
Тилло узук оламан, ёр-ёрей.
Ўнг ёғингдан кираман, ёр-ёрей,
Қўлингга узук соламан, ёр-ёрей.
Отанг арзон берсалар, ёр-ёрей,
Сени ўзим оламан, ёр-ёрей.

Осмонда ой ботмасин, ёр-ёрей,
Келин келган кечаси, ёр-ёрей.
Ҳаволар ёғиб ётмасин, ёр-ёрей,
Тўйга келган момолар, ёр-ёрей,
Тағин тойиниб кетмасин, ёр-ёрей.

Толдан тобоқ ёр-ёрей,
Тўйга келган момоларнинг,
Дарди томоқ, ёр-ёрей.

Толдан қошиқ, ёр-ёрей,
Куёв йигит олган ёри,
Олтин қошиқ, ёр-ёрей.
Сув келади пахса-пахса, ёр-ёрей,
Пойизингди жули тохта, ёр-ёрей.
Кўп йигитларнинг ичида, ёр-ёрей,
Куёв йигитни мақта, ёр-ёрей.

Чироқлари бешинчи, ёр-ёрей,
Пилиги ўн биринчи, ёр-ёрей.
Йигитларнинг ичида, ёр-ёрей,
Куёв жигит биринчи, ёр-ёрей (2).

* * *

Икки ёнма-ён,
Бўй беради ёр-ёр.
Икки куда тенг туриб,
Тўй беради ёр-ёр.

Бўз йигитнинг бўйнига
Тумор бўлдим ёр-ёр.
Севган ёрим юракда
Хумор бўлдим ёр-ёр.

Чимилдиқнинг боғини
Тўқитганмиз ёр-ёр.
Бизни қизни сўрасангиз
Ўқитганмиз ёр-ёр.

Ола қопдан отининг
Хўржини бор ёр-ёр.
Бўз йигит ҳеч билмаган
Сирларим бор ёр-ёр.

Куёв тўра уйларини
Толдан ёпган ёр-ёр.
Шундай гўзал келинчакни
Қайдан топган ёр-ёр.

Қўлларимдан бўз йигит
Ушламаган ёр-ёр.
Севганингиз борми деб
Сўрамаган ёр-ёр.

Осмондаги юлдузни
Саккиз деңглар ёр-ёр.
Саккиз қизни сардори
Келди деңглар ёр-ёр.

Ориятли хон қизи
Кетаётир ёр-ёр.
Армонлари қалбида
Ёнаётир ёр-ёр.

Саккиз қизни сардори	Айтай десам севгани
Биз бўламиз ёр-ёр.	Камбағалдир ёр-ёр.
Номозшомда очилган	Отасию-онаси ҳеч розимас ёр-ёр,
Гул бўламиз ёр-ёр.	Камбағал қўшни йигит қолаётир ёр-ёр.
	Ориятли келинчак кетаётир ёр-ёр.

Мен отимни қўшмайман	Сўзларга тилим ожиз — ёр кетади ёр-ёр,
Ёмон отга ёр-ёр.	Севганим бор диёлмас — зор кетади ёр-ёр.
Қандай жавоб берамано	Оллоҳимга топширдим сиз йигитни ёр-ёр,
Қиёматга ёр-ёр.	Вафосиз ёр кетди деб сўз айтмангиз ёр-ёр.

Чимилдипинг чип-чинор	Ор номусдан йиғлайди менинг қалбим ёр-ёр,
Бўйинг чинор ёр-ёр.	Дилдан йиғлаб кетадир бу муҳаббат ёр-ёр.
Бўйинга кўз тегмасин	Бўз йигитга тиладим бойчипор от ёр-ёр,
Олгин тумор ёр-ёр.	Минса қувнаб яйрасин ул чипор от ёр-ёр (3).

От минибди бўз йигит
 Бўзлаб-бўзлаб ёр-ёр.
 Минган оти саманми
 Ё жийронми ёр-ёр.

* * *

Тахта-тахта кўпирик,
 Тахтинг бўлсин, ёр-ёр.
 Пайғамбарнинг қизидай
 Бахтинг бўлсин, ёр-ёр.

Пайғамбарни қизини
 Ким кўрибди, ёр-ёр.
 Ота-она уйидан
 Ким тўйибди, ёр-ёр.

Оқ кўйлагим чокини
Сўтдим¹² она ёр-ёр.
Оқ сутинга рози бўл
Кетдим она ёр-ёр.

Ота-онам уйида
Бир гул эдим ёр-ёр.
Қафасда сайраб турган
Булбул эдим ёр-ёр.

Қафасимни ёнидан
Учди қушим ёр-ёр.
Бегона бир жойларга
Тушди қушим ёр-ёр.

Оқ теракнинг шохини
Ким қайирди ёр-ёр.
Келин қизни онасидан
Ким айирди ёр-ёр.

Оқ остона остига
Отам ётар ёр-ёр.
Оқ бўз отни юборса
Келмай ётар ёр-ёр.

Бориб айтинг жаброилга
Жавоб берсин ёр-ёр.
Етиб келсин қизларининг
Тўйларига ёр-ёр.

¹ Сўтмоқ — тикилган жойидан, чокидан счиш.

Кадидаги қатикни
Ким тўкибди ёр-ёр.
Кетаётган қизимни
Ким сўкибди ёр-ёр.

Қат-қатгина қатлама
Қатланибди ёр-ёр.
Қизни олиб янгаси-ё
Отланибди ёр-ёр.

Ҳай-ҳай ўлан жон ўлан
Ўланмисиз ёр-ёр.
Саккиз беҳишт ичида
Сардормисиз ёр-ёр.

Оқ милтиқ, қора милтиқ
Отган отам ёр-ёр.
Ўз қизини кўп пулга
Сотган отам ёр-ёр.

Ўз қизини йўлига
Бодом эксин ёр-ёр.
Бодом шохи қайрилса
Болам десин ёр-ёр.

Олисда тушган қизнинг
Ранги сариқ ёр-ёр.
Кўзидан ёши оқар
Мисли ариқ ёр-ёр (4).

КЕЛИН САЛОМ

Кайвони: Аввало оллоҳимга салом
Азизу авлиёларга салом
Биби Фотима, Биби Зухра
Сизларга салом.

Аёллар: Ҳазор алиқ, қуллуқ.

Кайвони Жаброилу Расулulloҳ,
Сизларга салом.
Иброҳим Халилulloҳ
Сизларга салом.

Аёллар: Ҳазор алиқ, қуллуқ.

Кайвони: Ё Муҳаммад, сизга салом,
Одам ато, момо ҳаво сизга салом.
Ўн саккиз минг оламнинг сарвари сизга салом.

Аёллар: Ҳазор алиқ, қуллуқ

Кайвони: Маккатилло йўлида,
Чор китоби қўлида,
Қайнота бувасига салом!

Аёллар: Ҳазор алиқ, қуллуқ.

Кайвони: Юзлари бор ойдек,
Қош кўзлари ёйдек,
Қуда холага салом.

Аёллар: Ҳазор алиқ, қуллуқ.

Кайвони: Уй айланиб иш қилган,
Қўли ювуқсиз ош қилган.
Янгаларига салом!

Аёллар: Ҳазор алиқ, қуллуқ.

Кайвони: Томга чиқса норвондек,
Икки кўзи алвондек,
Қадам ташлар полвондек,
Куёв болага салом!

Аёллар: Ҳазор алиқ, қуллуқ.

Кайвони: Бошга рўмол ўраган,
Тўй қачон деб сўраган,
Қўшнилариға салом!

Аёллар: Ҳазор алиқ, қуллуқ (1).

* * *

Кайвони: Бугдой узум ғўраси,
Куёвбекнинг жўраси,
Норғулойнинг тўраси
Баҳром акасиға салом!

Аёллар: Ҳазор алиқ, қуллуқ.

Кайвони: Бўш қозонга ош бошлаган,
Икки ёшга бош бўлган,
Қайнотасиға салом.

Аёллар: Ҳазор алиқ, қуллуқ.

Кайвони: Тол бешикка таянган,
Ўғлим бор деб суянган,
Қайнонасиға салом.

Аёллар: Ҳазор алиқ, қуллуқ.

Кайвони: Осмондаги юлдуздек
Қоши қора кундуздек,
Дили ойдин кундуздек
Қайнонасиға салом!

Аёллар: Ҳазор алиқ, қуллуқ.

Кайвони: Отга минса минордек,
Отдан тушса чинордек,
Куёв жўраларига салом.

Аёллар: Ҳазор алиқ, қуллуқ.

Кайвони: Ошга солган иликдек,
Қошу кўзи пиликдек
Келин дугоналарига салом

Аёллар: Ҳазор алиқ қуллуқ. (2).

* * *

Кайвони: Мирза терак ўстирган,
Файратли ўғил ўстирган,
Қайнонасига бир жуфт салом.

Аёллар: Раҳмат, қуллуқ.

Кайвони: Беқасам тўн жоғаси¹,
Айлансинда тоғаси,
Тоғаларига бир жуфт салом.

Аёллар: Раҳмат, қуллуқ.

Кайвони: Қирмизи чойнак шаммаси,
Айлансинда аммаси,
Аммаларига бир жуфт салом.

Аёллар: Раҳмат, қуллуқ.

Кайвони: Далаларнинг лоласи,
Айлансинда холаси,
Холаларига бир жуфт салом.

Аёллар: Раҳмат, қуллуқ.

¹ Жоғаси — ёқаси.

Кайвони: Қозонини қириллатган,
Чақасини чириллатган,
Қайнбаччаларига бир жуфт салом.
Аёллар: Раҳмат, қуллуқ.

Кайвони: Қўйлари қумларни жойлаган,
Корсондай қуйруқ бойлаган,
Чўпон акаларига бир жуфт салом.
Аёллар: Раҳмат, қуллуқ.

Кайвони: Эшагини их деган,
Носвойини туф деган,
Боболарига бир жуфт салом.
Аёллар: Раҳмат, қуллуқ.

Кайвони: Келин қандай экан деб,
Қўш овулдан сўраган,
Совчиларга бир жуфт салом.
Аёллар: Раҳмат, қуллуқ.

Кайвони: Токчадаги пачка пулдай,
Очилмаган атир гулдай,
Қайинсингилларига бир жуфт салом.
Аёллар: Раҳмат, қуллуқ.

Кайвони: Телпагини қайирган,
Ҳамма жойдан ҳақини айирган,
Тоғаларига бир жуфт салом.
Аёллар: Раҳмат, қуллуқ (3).

* * *

Кайвони: Боғда узум ғўраси,
Раисларнинг жўраси,
Тоғасига бир салом.

Аёллар: Куллуқ, кўп яшанг!

Кайвони: Бозорга бориб чой олган,
Сой олдидан жой олган,
Акаларига бир салом.

Аёллар: Куллуқ, кўп яшанг!

Кайвони: Киши ҳақини емаган,
Ҳеч қаердан қолмаган,
Боболарига бир салом.

Аёллар: Куллуқ, кўп яшанг!

Кайвони: Қалпоғини қайирган,
Тўйдан улоқ айирган.
Чопағон амакиларига бир салом.

Аёллар: Куллуқ, кўп яшанг!

Кайвони: Очилганда гулдай бўлган,
Ҳаммаларига бирдай бўлган,
Қайинсингилларига бир салом.

Аёллар: Куллуқ, кўп яшанг!

Кайвони: Бақилдоғи¹ ойнадай,
Ёйилиб оққан дарёдай,
Овсинларига бир салом.

Аёллар: Куллуқ, кўп яшанг!

Кайвони: Оёғида маҳсиси,
Боболарнинг яхшиси,
Қайнаталарига бир салом.

Аёллар: Куллуқ, кўп яшанг!

¹ Бақилдоғ — бўйинга осадиган тақинчоқ.

Кайвони: Орқасини чуватган¹,
Невараларини юпатган,
Момаларига бир салом.

Аёллар: Қуллуқ, кўп яшанг!

Кайвони: Яланг кўйлак киймаган,
Яланг оёқ журмаган,
Холаларига бир салом.

Аёллар: Қуллуқ, кўп яшанг! (4)

* * *

Кайвони: Эшиб² кўйган ипакдай,
Қоши кўзи пупакдай,
Келин салом бир салом,
Келинларига салом.

Аёллар: Балли қуллуқ, ҳазор алиқ!

Кайвони: Қизил олманинг пўсти,
Куёв йигитнинг дўсти,
Келин салом бир салом,
Куёв жўраларига салом.

Аёллар: Балли қуллуқ, ҳазор алиқ!

Кайвони: Қора кўйнинг барраси,
Йигитларнинг сараси,
Келин салом бир салом,
Куёв тўрага салом.

Аёллар: Балли қуллуқ, ҳазор алиқ!

¹ Чуватиш — ёш болаларнинг ўралашиб юриши.

² Эшмоқ — айлантириб, бураб, товлаб пишиқ қилмоқ.

Кайвони: Чилдирмани чалдирган,
Хотин-қизни йиғдирган,
Келин салом бир салом,
Санъаткорларга салом.

Аёллар: Балли қуллуқ, ҳазор алиқ!

Кайвони: Ҳовлисидан йўл берган,
Қўтанидан¹ қўй берган,
Келин салом бир салом,
Қайнотасига салом.

Аёллар: Балли қуллуқ, ҳазор алиқ!

Кайвони: Ўчоқ бошдан уйрилган²,
Ўғил туғиб керилган,
Келин салом бир салом,
Қайнонасига салом.

Аёллар: Балли қуллуқ, ҳазор алиқ!

Кайвони: Тўлиб оққан сойдаин,
Ўн тўрт кунлик ойдаин,
Келин салом бир салом,
Янгаларига салом.

Аёллар: Балли қуллуқ, ҳазор алиқ!

Кайвони: Мачитимиз йўлида,
Жойнамози қўлида,
Келин салом бир салом,
Боболарига салом.

Аёллар: Балли қуллуқ, ҳазор алиқ!

¹ Қўтан — қўйларни қамаб қўядиган махсус жой: қўра, қўйхона.

² Уйрилган — уймалашган..

Кайвони: Токчадаги совундай,
Ичи тушган қовундай,
Келин салом бир салом,
Момоларига салом.

Аёллар: Балли қуллуқ, ҳазор алиқ!

Кайвони: Тоғдан ўтин ташиган,
Айланиб бошини қашиган,
Келин салом бир салом,
Қайин укаларига салом.

Аёллар: Балли қуллуқ, ҳазор алиқ! (5)



Хотамова Ойим



Муродалиева Зумрад




Хотамов Нарзулло



Салаева Нурбиби



Соатова Ҳайитгул



Ягшибоев Абдуҳамид



Содиқова Майсара



Пулатова Хурсаной

АЛЛАЛАР

(1) – Сурхондарё вилояти, Узун туман Ж.Эшмирзаев жамоа хўжалигида истиқомат қилувчи 1929 йилда туғилган Турғунова Аширгул момодан 2003 йил май ойида М.Наимов ёзиб олган.

(2) Сурхондарё вилояти, Денов туман, Ғалаба жамоа хўжалигида истиқомат қилувчи 1925 йилда туғилган Содиқова Майсара момодан 2003 йил сентябрь ойида М.Наимов ёзиб олган.

(3) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

(4) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1926 йилда туғилган Қораева Зайнаб момодан 2003 йил сентябрь ойида М.Наимов ёзиб олган.

(5) Х.Ғафуров. “Халқ ўйинлари, қўшиқлари ва анъаналарига бир назар. Тошкент: Камалак, 1992. – 52-бет.

(6) Сурхондарё вилояти, Шўрчи туман Ижтимоят жамоа хўжалигида истиқомат қилувчи 1952 йилда туғилган Соатова Ҳайитгулдан 2003 йил октябрь ойида М.Наимов ёзиб олган.

(7) Сурхондарё вилояти, Денов туман Ш.Худойназаров жамоа хўжалигида истиқомат қилувчи 1948 йилда туғилган Пўлатова Хурсаной момодан 2003 йил октябрь ойида М.Наимов ёзиб олган.

(8) Сурхондарё вилояти, Денов туман Мустақиллик жамоа хўжалигида истиқомат қилувчи 1960 йилда туғилган Раҳмонқулова Махбубадан 2002 йил март ойида М.Наимов ёзиб олган.

ҲҲҲО-ҲҲҲ

(1), (2) Сурхондарё вилояти, Шўрчи туман Ижтимоят жамоа хўжалигида истиқомат қилувчи 1936 йилда туғилган Янгибоев Абдуҳамид бободан 2003 йил октябрь ойида М.Наимов ёзиб олган.

(3) Сурхондарё вилояти, Олтинсой туман Катта Вахшивор қишлоғида истиқомат қилувчи 1940 йилда туғилган Хотамов Нарзуллодан 2003 йил ноябрь ойида М.Наимов ёзиб олган.

(1) Сурхондарё вилояти, Денов туман Ўшор қишлоғида истиқомат қилувчи 1956 йилда туғилган Раҳимова Ҳабиба опадан 2003 йил май ойида М.Наимов ёзиб олган.

(2) Сурхондарё вилояти, Денов туман Ш.Қобилов жамоа хўжалигида истиқомат қилувчи 1913 йилда туғилган Муроталиева Зумрад момодан 2003 йил август ойида М.Наимов ёзиб олган.

(3) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

(4) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

КЕЛИН САЛОМ

(1) Сурхондарё вилояти, Денов туман Ўшор қишлоғида истиқомат қилувчи 1956 йилда туғилган Раҳимова Ҳабиба опадан 2003 йил май ойида М.Наимов ёзиб олган.

(2) Сурхондарё вилояти, Денов туман Қ.Каримов жамоа хўжалиги Ойбарик қишлоғида истиқомат қилувчи 1935 йилда туғилган Солаева Нурбиби момодан 2003 йил ноябрь ойида М.Наимов ёзиб олган.

(3) Сурхондарё вилояти, Денов туман Ш.Худойназаров жамоа хўжалигида истиқомат қилувчи 1948 йилда туғилган Пўлатова Хурсаной момодан 2003 йил октябрь ойида М.Наимов ёзиб олган.

(4) Сурхондарё вилояти, Денов туман Ш.Қобилов жамоа хўжалигида истиқомат қилувчи 1913 йилда туғилган Муроталиева Зумрад момодан 2003 йил август ойида М.Наимов ёзиб олган.

(5) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

МУНДАРИЖА

М.Жўраев. Асрларга бўйдош қўшиқлар	3
Аллалар	7
Ҳуй-йо ҳуй	15
Ёр-ёр	19
Келин салом	26
Манбалар кўрсаткичи	38

Босишга рухсат этилди 03.04.2006 й. Бичими 60×84 $\frac{1}{16}$. Адади 500 нусха.
Гарнитура Таймс Тад. Шартли босма табағи 2,5. Буюртма № 42.

«MirINFORM» МЧЖ
босмахонасида чоп этилди.
Тошкент ш., Мустақиллик майдони, 2
Тел.: 1282763